



國朝耆獻類徵初編



明倫彙編
家範典
孝行典
卷一百一十五



國朝耆獻類徵初編卷百三十三目錄

諫臣一

梁維本

王亮教

孫襄

阿什坦

吳贊元

王肅

趙班璽

蘇京

王伯勉

季振宜

賈宏祚

方亨咸

翁自涵

王廣心

季開生

成性

周曾發

趙吉士

鄭爲旭

從弟爲光

周季琬

笱重光

李鼎玉

余縉

蘭挺達

耿應張

吳雲清

吳國龍

李森先

何嘉祐

傅晨

許之漸

顧豹文

國朝耆獻類徵初編卷百三十三

通奉大夫前署江西巡撫江西布政使司布政使湘陰李桓輯
諫臣一

梁維本

公諱維本字立甫姓梁氏世爲真定人祖諱夢龍前明萬厯閒官
吏部尙書稱名臣父忠以蔭授錦衣衛千戶公弱冠補弟子員天
啟辛酉舉於鄉屢試禮部不第順治元年 世祖章皇帝詔求賢
才公以吏部尙書劉公薦 召試內院稱 旨除中書舍人尋遷
禮科給事中時天下初定一切制度草創左右勳舊大臣多以戰
功顯 經筵日講諸大典未遑舉行公首抗疏略曰 皇上隆堯

舜之姿躬岐嶷之美臣才識驚下無能仰裨高厚竊計今日所以助成聖德者莫急於經筵伏願皇上延見碩輔親禮儒臣畱神經史之學讀漢書習漢字奏章不藉繙譯大臣面陳幾務通上下之情防壅閉之漸羣下獲望盛德休光天下幸甚況皇上說學則滿洲蒙古大臣莫不說學其裨益尤大疏入上嘉納之而前明經筵故事先期禮部擇吉日以聞是日內侍陳講座勳臣駙馬陳侍衛夾陛皇帝出御殿鴻臚引知經筵侍班講讀臣北面載拜以次上殿東西鄉立御史給事中各一人東西立北鄉鴻臚贊進講翰林進講臣二人出班北鄉立展書臣二人進立銅鶴下東西鄉鴻臚贊拜已展書臣跪展書講臣進講已命賜酒食以次下

殿北面載拜出議者以爲禮儀繁縟故議久未行公復抗疏曰
皇上幸採臣言將肇舉曠典甚盛事也臣愚以爲時有質文禮有
損益況體貌過盛厭怠易生 聖躬有臨蒞之勞臣下無由盡納
牖之益進講儀宜從簡易斯可行於今者故 世祖親政開經筵
興禮樂妙選侍從文學儒臣皆公疏啟之也公美髭髯長身白晢
居家孝友和易鄉里稱長者及爲諫官數慷慨言事疏請明職掌
議遷除興水利皆關國家大計四年遷刑科右給事中禮部試天
下士以公爲同考試官出公門下者十有六人五年遷戶科左給
事中又遷禮科都給事中公前後歷官未嘗出諫省益侃侃發舒
無所迴避條上封事以十數 上多從其言七年以疾卒於京邸

初公居鄉喜施子歲饑生子女多棄不舉者公設法勸收所存活甚眾次子宏明季掌北鎮撫獄公手書敕宏宜爲國家培元氣毋訶伺鉤距以人命易功名宏多所平反闖賊入都殉節死之子八人清寬清標尤知名皆由翰林官尙書今方爲時名臣功名宜載國史其它子姓生卒月日具詳前禮部尙書弘文院學士王公鐸誌銘中嗚呼某於公爲門下士曩十六人者某其一也距公沒二十有七年爲 今上康熙十五年某蒙 恩復用道出真定獲拜公墓下泣然久之嗚呼公立朝表表大節固亡待某言某小子眷念師恩庶幾得繫公墓道之石以慰余思焉墓在真定之某原

右墓表邵長蘅代某撰

王亮教

往予匏繫都門齊魯之士蓋締維桑之社云於時改玉之初國
華蔚起而大江以北則山左之英彬彬爲最不佞歡然編紵之末
飲酒樂愷而馳驅王路相切劘迨予請告歸里門諸君子出入
升沈聞已落落散去比予子舍十年所而一二同人遂有山陽之
賦涼涼蘭籍遊岱多人齒率少壯然後喟然長歎憶南皮之歡遊
西園之良晤俯仰間已爲今古則吾於侍御王公隧道之詞義不
可以疏慵辭也按狀君姓王氏諱亮教字弼之先世冀之棗強人
始祖諱阿瞿明初徙陽邱七傳爲心一君曾祖也太學生簿交
河有隱德心一生服南邑庠生舉丈夫子八人季諱津敕封文

林郎四川道監察御史配劉氏 贈太孺人生四子君其仲也生

而穎異試多前茅己卯舉於鄉又五年 太清革命 詔諸孝廉

分符試州縣君得宣平邑素刁競訟君不矜虞芮之質而片語解

紛兩造頰首而退四越月囹圄之草可擷也草昧初丁銅馬接壤

渠邱之潰不俟浹辰君素慷慨多大略乃部勒邑中健兒數肄之

矛鋌劍戟鸛鵝不忒明恥教戰屹然河陽壁壘進父老慰之曰而

無憂萑苻亦知而公海岱間技擊雄耶且而鄉五千君子何遽讓

前人是荷戈者勇可鼓也以此執訊孰能禦之二三父老其高枕

良食哉無何賊以僞牌入境君三伏待之復令邑人廣庀菱糗云

郡將銅符夜下矣至夕賊果腐至炬光絡繹凡數十里將薄邑知

有備也而復疑援師且至遂烏獸散去當是時處州屬邑十有一其九皆陷而宣平無城郭安堵不驚後鋒車內召寇伺君甫出境輒來侵邑人斬獲八百級渠魁殲焉上功幕府攝篆者與鵬冠爭功幕府曰若亦何功此舊令之成勞耳其信上而孚下也如此己丑考授御史命按兩浙浙中利弊君已素知而浙人亦喁喁待澤喜相告曰此吾向者宣平君也會停差旋都門辛卯復奉命按河南蓋天中奧區自闖賊蹂躪以來千里蓬蒿非復河洛舊觀君攬轡星輶疇咨蒿目凡可使魯有鳩者無不湊成手中也禹州巨盜張揚旣招撫而狼子野心猶故殘食方隅市咸以目當事者隱若敵國未敢以柱後惠文從事君慨然曰此輩飛而食人而

吾以法冠坐視其去傳之翼者幾何且何以對揚 休命乃力請
正法還其所掠子女七十餘家行刑之日快若然膾食其肉者頃
刻而盡至單騎下邑親驗稅櫃有羨餘者懲之百城聞風爲股慄
焉里居以關說公事爲恥矍然劉季陵風度也而民瘼則娓娓言
之如杜密爲德於鄉復如此邑人至今思之配甯孺人邑巨族性
靜恪嫺內則姑嘗病劇絕粒孺人焚香祝天矢單衣三載祈勿藥
果霍然起繼而太翁復病孺人仍對天誓祝終身素食三時供香
翁又復霍然起此亦簪笄曾閔哉不佞習君有素豐頤偉幹談笑
藹然槃槃之器吾黨中僑肝也分符則爲能吏持斧則爲名御史
梟獍授首踰於破柱方期翔步天廔舒以千里之駕而中道玉折

天下惜之君生於明萬厯辛亥正月初四日卒於 皇清順治戊
戌十二月二十一日享年四十八歲孺人生於明萬厯庚戌正月
二十五日卒於 皇清康熙癸卯九月十八日享年五十四歲子
四有則郡廩生有經邑庠生有恪早卒有嚴女二孫女四今卜本
年十二月二十二日安厝於邑東南西皋莊之新阡乃系之銘曰
越水湯湯豫土茫茫撫最貞之斑璘兮睇繡斧之焜煌神鋒截玉
一試而藏韜於下之爲魚腸兮射於上之爲龍光貞珉銘詩劍履
藏終古灝氣允不亡

右墓誌銘高珩撰

孫襄

孫襄字惠可江南宣城人順治初官刑科給事中時方用兵諸司決獄多意爲輕重襄請議定律令爲畫一之制轉吏科請定計典勵官守又嘗請駐防兵無奪民居前後疏多見採用又甯郡貢黃連非土產襄力言於當事得減免

右述聞謚瑤錄

阿什坦

滿洲完顏給諫阿什坦通經學篤於踐履順治初繙譯大學中庸孝經諸書刊行之以教旗人皆出其手時稗官小說盛行滿人多繙譯給諫上言學者宜以聖賢爲期經史爲導此外無益雜書當屏絕又請嚴旗人男女之別定部院九品之制俱報可康熙初退閒家居鼇拜專政欲令一見終不往嗣以薦起聖祖嘗召入便殿問節用愛人對曰節用莫要於寡欲愛人莫先於用賢聖祖顧左右曰此我朝大儒也

右紀聞陳康祺撰